

B. H. C.
FIRENZE
3212
15



DE LAUDIBUS
15 CLEMENTIS XII.

P. O. M.

O R A T I O

H A B I T A

A' NICOLAO GALEOTTI
SOCIETATIS JESU

In Aula Maxima Collegii Romani.

Eminentissimo ac Reverendissimo Principi

N E R E O

S. R. E. CARDINALI

C O R S I N O

Sanctissimi Dñi Nostri Fratrifilio

D I C A T A.



ROMÆ, MDCCXXX. Typis Antonii de Rubeis, è Foro
Rotundæ, in via ad Seminarium Romanum.

SUPERIORUM PERMISSU.

Eminentissime, ac Reverendissime
PRINCEPS.



*Um quæ proximis hisce
diebus, Eminentissime,
ac Reverendissime Princeps, de PATRUI
TUO SANCTISSIMO publicè dixi, obser-*

*vantiæ causa in lucem edere cogitarem ,
nunciatum illico fuit , Te nova dignitate
auctum , eo cum bonorum omnium plau-
su , quem excitare debuit merces egregiis
Tuis in Rempublicam meritis attributa .
Quare nihil cunctandum sum ratus , ut
Orationem hanc nomini inscribendam ,
curarem Tuo, & inde illi , quod unum es-
se posset ornamentum accerferem . Quod
enim CLEMENTIS est , id omne ad Te
pariter jure optimo pertinet : utpote qui
ad illum proximè non tam cognatione ,
sanguinis , quàm virtutum præstantissi-
marum similitudine accedis . Testis est
Europa cuncta , quantum illæ se prodide-
rint in Regum aulis , cùm Legationibus
obitis , tum rebus sapientissimè admini-
stratis . Quamquam non opus est nobis ,
qualem Te præstiteris antea , ab exteris
nationibus percunctari .*

*Siquidem maximæ omnium potesta-
tis adjutor , & administrator in hac Orbis
terrarum luce positus illud fidei , vigilan-
tiæ , sapientiæ , singularisque benigni-
tatis*

*tatis dedisti specimen , ut hanc ad bene-
merendum propensionem mutuatus planè
videaris à Cœlite illo Beatissimo , qui spe-
data vitæ sanctimonia effecit , ne quid-
piam Genti Tuæ nobilissimæ ad nominis
immortalitatem deesset . Quando igitur
gaudent universi præclaras hasce animi
dotes , atque ornamenta tam illustri loco
esse sita , patere me quoque idipsum Tibi
qualicunque hoc oblato munere gratula-
ri . Erit Pontifici Optimo gloriæ argu-
mentum non leve, quod omni laude cumu-
latus IPSE PRINCEPS ejus laudum patro-
cinium susceperis .*

FRANCISCUS RETZ

Præpositus Generalis Societatis Jesu.

CUm Orationem de laudibus CLEMENTIS XII. P. O. M. habitam in Aula maxima Collegii Romani a P. Nicolao Galeotti Societatis nostræ Sacerdote, aliquot nostræ Societatis Theologi recognoverint, & in lucem edi posse probaverint, facultatem facimus, ut typis mandetur, si iis, ad quos pertinet, ita videbitur, cujus rei gratia has litteras manu nostra subscriptas, & sigillo nostro munitas dedimus. Romæ 17. Decembris 1730.

Franciscus Retz.

~~~~~

*Imprimatur.*

Si videbitur Rmo P. Mag. Sac. Pal. Apost.

*N. Baccarius Ep. Bajan. Vicefg.*

~~~~~

Imprimatur.

Fr. Joachim Pucci Sac. Th. Mag., & Socius Rm̃i Patris Sac. Pal. Apost. Mag. Ord. Præd.

ORA

O R A T I O.



SI cui contigit, ut cum SUMMA PRINCIPIS laudes esset in amplissima virorum concione prædicaturus, nulla foret ei vel assentationis, vel arrogantiae nota pertimescenda, illud profectò consecutus esse videor, cum data mihi provincia est, ut in hoc pleno Majestatis, & amplitudinis cœtu Sanctissimo Ecclesiae Moderatori CLEMENTI XII. delatum Superioribus hisce Mensibus Pontificatus honorem, publico hujus Romani Collegii nomine gratularer. Etenim præterquamquod ea sunt illius in universam Remp. merita, ut tametsi dicantur de illo plurima, plura tamen ob eorum multitudinem, prætermittere necesse sit, quis nos ad id muneris exequendum adductos esse non videat, non solum communis lætitiæ causâ, verum etiam, gratiæ alicujus pro colato nobis olim honore, quoquomodo possumus referendæ? Cum enim ab ineuntis adolescentiæ flore hoc Ille Gymnasium non minùs assiduitate suâ, quàm virtutum omnium, quibus ætas florere illa potest, lumine auxerit, ac decoraverit, succensere mihi potest, opinor, nemo, si laudes illas dicendo persequar, unde sentiam in has liberales quoque artes tantum ornamenti, ac decoris redundare. Ac si ullo tempore declaranda hæc à nobis voluntas fuit, hoc certè esse debet, cum universus Ordo noster, non sine Dei immortalis numine, in hanc Arcem omnium gentium convenit, ut quam in longinquis terris tam faustæ rei accepto nuncio lætitiâ cæperat, coram nunc patefaceret, pedibusque Parentis Optimi suppliciter advolutus jucundif-

(VIII)

simo ejus aspectu, atque alloquio recrearetur. Ita fiet, ut si qua minus ornatè dicam, præsentia socii suâ aliquâ saltem ex parte suppleant, quæ maximo debetur Principi commendationem. Unum tamen ad cumulandum gaudium animadverto mihi esse adversarium maximè, quod in tanta rerum dicendarum magnitudine, atque præstantia neque unam præ alia feligere facili negotio possim, neque certum in dicendo mihi finem, rationemque præscribere. Faciam igitur, quod advenæ regiam ingressi Urbem solent, qui modico sibi spatio ad conspiciendum dato, nullo pene discrimine quoquo versus oculos, animumque circumferunt, reversique ad ea, quæ primo fuerant contemplati, rerum pulchritudinem hæsitantia linguæ potius, & animi stupore quodam, quàm exquisito dictionis genere prædicant: Sic ego tot eximiarum CLEMENTIS virtutum admiratione defixus eò provehar oratione mea, quò me sponte suâ conceptus quasi quidam impetus rapiet: Quæcumque tamen dixerò, expectate certè, Auditores, omnia plena laudis, honestatis, amplitudinis, plena gloriæ: Eum denique Principem vobis animo, & cogitatione depingite, qui omnia facta, atque consilia sua ad virtutem referat, ac dignitatem, & quo propterea ad Ecclesiæ præfecturam evecto, non tam delatum illi summum honoris gradum, quàm Sacerdoti ipsi magnum decus additum gratulemini. Nam si ex veterum sapientum sensu ille verè appellandus est honor, qui perpetuæ virtutis est præmium, quid Ecclesiæ cunctæ accidere gloriosius poterat, quàm eum nancisci Præsidem, qui non intermisso vitæ totius sanctissimè, honestissimèque actæ cursu ad summum honoris fastigium sibi aditum patefecerit? Ac verè ut ad hujusmodi gloriam contenderet, mirabiliter egregia omnia cum naturæ, tum fortunæ munera consenserunt. Quæ enim in Heroibus procreandis felicior patria, quàm Florentinorum Civitas, quæ cum litterarum scientiâ,

divitiarum copiâ, militari gloriâ, & incolarum nobilitate floruit quàm quæ maximè, tum in Sacrorum procuracione longè etiam plurimis antecellit? Ubi enim memoria vetera repetentibus non occurrent vobis Florentini Præsules, ac Purpurati Patres innumeri, qui partim Sanctitate morum, partim doctrina, atque consilio, partim denique immensis perferendis laboribus, ac morte ipsa constantissimè obita, egregiam Ecclesiæ operam non collocaverint? In hac ipsa Dignitatis Sede celsissima nonne solemne jam factum esse videmus, ut geminis unoquoque ferè Sæculo Florentinis Pontificibus universæ Christianæ Reipublicæ gubernacula committerentur? Verùm LAURENTIO CORSINO non externis opus erat exemplis, quandoquidem satis superque domestica suppetebant, quibus incensus incredibili flagraret veræ laudis comparandæ cupiditate. Cum enim in ea familia natus esset, in qua verus honor, ac splendor enituisset, fieri certè non potuit, quin excelsa omnia, atque præclara, & adolescente digna optimo cogitaret. Quâ quidem in re nolite à me quæso virorum illorum quasi censam institui, qui ex CORSINA FAMILIA sive apud exteras nationes, sive etiam in patria gravissimis Reip. muneribus defuncti sunt. Supervacaneum esset enumerare singulos Patres conscriptos, Oppidorum Dynastas, Regios Consiliarios, copiarum Duces, Syniscalcos, quos vocant, Legatos, atque Oratores, quibus Gens ista Romæ, Florentiæ, atque in Hispania feliciter propagata sese commendavit memoriæ hominum sempiternæ. Alia enim obversabatur Principi nostro rerum præclare gestarum gloria, ut ad sanctius amplectendum vitæ genus inflammaretur. Cogitabat ille secum, quantum de Religione meriti olim fuissent CORSINI illi Fesulanæ, ac Volaterranæ Ecclesiæ Moderatores, qui tametsi alieno Reipublica tempore, vel Sacris ferendis legibus, vel prævis hominum

moribus corrigendis tantopere in retinenda vetere disciplina laboraverunt . Quantum Petrus ille Florentinus Episcopus , & S. R. E. Cardinalis amplissimus perhonorifica legatione sua , quam ad Carolum IV. Cæsarem objit , à quo ob conciliatam inter Pannoniæ Regem , aliosque Germaniæ Principes pacem , acceptum S. R. I. Principis titulum hæreditarium successoribus fecit . Quantum Americus Florentinus item Episcopus , qui ob eximiam , singularemque virtutem à Martino V. Pontifice primus omnium Provinciæ suæ Metropolitanus est constitutus : ut inde potissimum liqueat quicquid honoris est Florentinæ Cathedræ , sive à Pontificibus , sive à Cæsaribus attributum , id omne ab hujus familiæ nobilissimæ Gentilibus præfluxisse . Quid illa duo nostra , Patrumque memoria Romanæ Curiæ lumina Octavianum , & Cardinalem Nereum dicam ? Quorum alter ad Ludovicum XIII. Legatus in Galliam tantum laboris , ac studij contulit ad nefariam illorum Sectam hominum profligandam , qui à Romani Pontificis obedientia desciverant , alter verò eadem legatione paricum laude perfunctus , vel hoc nomine immortalitatem adeptus est , quod eam Fratris Filio , Principique nostro præbuerit institutionem , unde tanti in universos homines fructus essent consecuturi . Sed qui Adolescentem egregium domesticæ laudis oblivisci non sineres , tu eras in primis , ANDRÆ Beatissime , qui ex illo piorum concilio non solum præsentis ope , sed eximiæ quoque sanctitatis exemplo sponte jam suâ currentem , veræ laudis , & gloriæ stimulis concitabas , efficiebasque , ut quemadmodum ipse tam insigni prodigio præsignificatus orbi fueras , ita Nepotem hunc tuum divinitus verè nobis datum , & quasi Cælo delapsum hominem arbitraremur . Ab his majoribus ortus LAURENTIUS CORSINUS nihil sibi studio habuit magis , quam ut acceptam ab illis gloriam insigni aliqua rerum pulcherrimarum accessione locu-

locupletaret. Itaque in Romano Seminario eloquentia, ac severioribus disciplinis excultus, in Pisano primum, Athenæo, deinde verò hîc etiam Romæ totum ad humani, divinique juris cognitionem se dedit: sic, ut ingenio, labore, industria, atque profectu expectationem, quæ de ipso erat cæteroqui maxima, non sustineret modò, sed multis quoque partibus superaret. Incredibile verò dictu est, quàm propensa jam inde eluceret in eo ad virtutem indoles, quantamque vitæ innocentiam cum hujusmodi litteratura conjungeret. Abundabat ille divitiarum copia, cognationibus, atque affinitatibus florebat amplissimis, perpolito item ingenio, liberali specie, ac singulari affabilitate sermonis incredibiliter sibi animos conciliabat; & quamquam plura certè deesse non poterant in illo ætatis flexu voluptatum invitamenta, in Principe tamen nostro quid non moderatè, quid non verè recundè, quid non piè, quid non religiosè dictum, aut factum animadverti unquam potuit? Ut quæ nunc est in **CORSINO** Pontifice morum gravitas, atque constantia, eandem fuisse in **CORSINO** Adolescente affirmare, qui tunc ei erant contubernales, non dubitent. Quò minus mirandum est, si quid honoris foret, quo posset juvenilis illa ætas ornari, id omne ab æqualibus consensione, mirifica sæpe numero **LAURENTIUM** obtinuisse. Magnum quippe jam tum Reipublicæ præsidium in Adolescente optimo præfagiebant, & quemadmodum Cyri illius delitescentis in silvis majestatem sentiebant pastores pueri, ita **LAURENTII** æquales ex tam egregiis moribus videbantur ejus, quæ futura deinceps erat, amplitudinis conjecturam capere. Neque diu expectandum certè fuit, donec ex umbratili, ac domestico vitæ genere in solem, ut ajunt, ac pulverem progredieretur. Ad capeffendam Rempublicam bonorum omnium votis expetitus plures in ea perhonorificos Magistratus habuit, atque ita gessit, ut haud facile sit existimare, utrùm plus ei

se

(XII)

se debere Pontificiæ ditionis homines prædicarent, an-
 verò conaretur ipse illorum commodis, atque utilitati
 prospicere. Quid plura? Adeo sedulitatem, ac vigilan-
 tiam probavit suam, ut ei Cameræ Clerico, Protono-
 tario, ac Nicomediensi Archiepiscopo renunciato publi-
 ci ærarii, Pontificiæ classis, Hadrianae hujus arcis, alia-
 rumque maritimarum præfectura committeretur. Vide-
 tis porro, Auditores, quanta uni viro fuerit negotio-
 rum moles imposita, quantaque propterea de ipso fuerit
 bonorum omnium exillimatio. Equidem difficilem in-
 primis, atque ancipitem rem esse arbitror, in eâ rerum
 varietate ita officium servare, ut in levem aliquam si-
 minus culpæ, at erroris certè suspicionem non venias.
 Sive enim gravitatem, sive multitudinem, sive opportu-
 nitatem spectes, quod tantum in hominem cadere con-
 silium potest, ut abstrusissima quæque, atque recondita
 comprehensa teneat, tamquam in conspectu posita? Quæ
 tanta animi magnitudo, ut in secundis rebus plus æquo
 non efferatur, & in adversis non concidat? Quæ tanta
 in consciendo religio, ut ne latum quidem unguem à ju-
 stitiæ certa quadam præscriptione deflectat? Ex his au-
 tem scopulis feliciter evasit **CORSINUS**, admirabilique
 altitudine animi fretus fructus uberrimos ex perfectione
 maximorum operum cepit. Una dumtaxat in re solertia
 ejus, atque industria desiderari plurimum visa est; quòd
 cum maturus honoribus judicaretur, neglexit omnino
 sese, maluitque benemereri de aliis, quàm quæ bene-
 meritis debita essent præmia avidius, quàm deceret, ex-
 petere. Prohibebantur operam illi suam proceres summâ
 gratiâ, atque autoritate apud Pontifices præditi, ut si
 minus ea curare ipse vellet, curari saltem aliorum roga-
 tu, & commendatione sineret: quibus ille cum magnam
 se habere gratiam diceret, hoc unico respondebat: op-
 ratis quidem suis eâ, quam tunc gereret, administratione
 cumulativè satisfactum: hoc unum se habere in votis,
 ut

ut ipse quoque aliis eo, quod injunctum sibi fuisset, munere satisfaceret. O vocem sapientissimo viro dignam, o continentissimæ, atque honestissimæ indicem voluntatis! Satius quippe ducebat plura adhuc honestè, ac rectè facere, quàm quæ honestè, ac rectè fecisset ab aliis commemorari; negabatque aliam in re bene gerenda, mercedem spectari oportere, quàm conscientiæ pretium. Fuit tamen tempus illud, cum acer, & intelligens hominum æstimator Clemens XI., cum plures cooptavit in senatum præstanti doctrinâ, & consilio, Patres amplissimè de Nicomediensis etiam Antistitis merito, ac dignitate decrevit. Credo ego, Pontificem illum ab hac mortali corporis concretionem sejunctum sibi placere apud Superos, quod ejus, quâ fruimur in præsens, nobis jecerit semina felicitatis, talemque virum in eo locaverit dignitatis gradu, unde ad summum quoque fastigium eveheretur, & universo hominum generi esset incredibiliter profuturus. Age vero, quam proposuit sibi Cardinalis amplissimus a laboribus, quibus hætenus persunctus fuerat, cessationem? Immo verò perinde, ac si tunc primum rerum gerendarum Tyrocinium poneret, nullas ostendit summis viris esse oportere à præclaris actionibus ferias, nullam præstantis exercendæ virtutis intermissionem. Non ita multorum annorum intervallo sacris ferè omnibus Purpuratorum Patrum adscriptus cœtibus, quos adhibere Pontifices in consilii capiendi deliberatione solent, quantum Reipublicæ, ac bonis omnibus commodarit, nihil attinet commemorare. Vos ipsi aderatis unâ Collegæ vestro, Patres Amplissimi, sapientiamque ejus intuentes propiùs, tantam illius partem uni viro attributam esse demirabamini. Quàm simplex, bone Deus, quàm sincerum in ferenda sententia judicium, quàm ab omni cupiditate vacuum, quàm ad veritatis, justitiæque normam excogitatum! Perspectum erat omnibus, nihil ab eo privata utilitati,

Tac. is vit.
Ag.

ni-

nihil amicitiae, nihil gratiae, nihil cuiusquam precibus tribui. Sed hoc æquitatis conservandæ studium, ut aliquantò magis in apertum proferam, sinite me hoc loco, Auditores, modestissimi Principis pudori aliquid indulgere, & ab eo parumper avertere orationem meam, ut de ipso reticens, rem totam vobis ante oculos ponam. Neminem vestrum latet, quàm arduum sit, atque difficile, Romæ præsertim in tanto studio partium, tam discrepantia inter se judicia subire, itaque dissidentes voluntates hominum conciliare, ut sint illi quoque quidquid ipse senseris probaturi. Frequentes enim sunt in Romana Curia omnium ferè nationum, ac gentium iureconfulti, doctrinâ, sapientiâ, auctoritate, atque exercitatione clarissimi. Summum proinde inesse oportet in eo ingenii robor, ac firmitudinem, qui debeat penè dicam extempore, & rerum causas animo, & cogitatione complecti, & singula percontantibus diligenter occurrere, & immensam penè rerum molem totis memoriæ, atque intelligentiæ viribus sustinere. Hæc autem quàm feliciter expediverit, atque transfegerit LAURENTIUS CORSINUS, non aliunde argumentum capiam, quàm ex iis, quæ vos ipsi oculis usurpabatis. Infinitâ prope doctissimorum virorum frequentiam CORSINI DOMUS celebrabatur, qui eum sive de provincialibus controversiis, sive de Ecclesiastica disciplina, sive de sacrorum cultu, ac religione consulere, in rebus quibuscunque versatum reperiebant, ac si totum vitæ suæ spatium in unoquoque illarum genere contrivisset. Et cum huiusmodi esset in illo rerum gerendarum usus, mirabitur quispiam Religiosas Familias, etiam toto orbe terrarum celebratissimas, Gynæcea, Sodalitates, Collegia tam avidè sibi CARDINALIS CORSINI clientelam, quasi portum quemdam ab impendentibus tempestatibus tutum, ac salutarem depoposcisse? Innumera demandatæ illi fuerant huiusmodi procurationes, ut vel

ca-

earum memoriâ retinendo censu obrui penè animus videretur. Adeo tamen præsto erat omnium salutis, atque famæ ut aliæ in dies, atque aliæ ab iis, quorum intererat, demandarentur. Et vero quâ incredibiles amores non excitaret sui Princeps ille amantissimus, apud quem tam faciles essent aditus, nulliusque inopia, ac solitudo non modo populari illo, ac tribunali accessu, sed ne domûs quidem ipsius adytis prohiberetur? Quid? Parumne hoc indicare credas propensam in omniâ ordinum, atque omnis fortunæ homines voluntatem, quod cum incommoda etiâ valetudine uteretur, magnam dici partem, ad colloquium admitteret, quicumque à se vel consilium, vel patrocinium efflagitarent? O animi magnitudinem prædicandam, & ejus verè, qui se non sibi, sed toti mundo natum existimaret! Languibat viribus Princeps humanissimus, insomnes ducebat noctes, ac permolestis toto corpore doloribus conflictabatur: suæ tamen salutis planè immemor malebat aliorum commodis, utilitatique servire, quàm videri minus quàm posset Reipublicæ providere. At verò quod a negociis reliquum erat temporis in quiete, credo, atque honestis animi relaxationibus traducebat: Conveniebant scilicet statis horis ad Illum Dynastæ, Patricii, Proceres, Optimates, atque adolescentes primarii generis nobilitate, ingenio, eruditione, ac litteris ornatissimi, quibuscum convivaretur interdum, & à forensi strepitu animum recrearet. Sed quid aliud conventus ille fuit, nisi bene moratæ juventutis asyllum, bonarum artium gymnasium, seminarium Reipublicæ, officina sapientiæ, ac diversorium virtutum omnium? Quem enim recti per suasorem faciliorem invenias, ut Cassiodori verba ponam, quàm eum *sub* Cassiod. ep. 4. l. 1.
ejus prædicabili conversatione ceteros quoque pudeat probabiles mores non habere? Porro cum plerumque fiat, ut in illa sermonis communicatione erumpant liberiùs, quæ diu conclusa retinemus animi sensa, dici vix potest, quàm

(XVI)

quàm uberes inde florentissimus ille nobilitatis coetus caperet sapientiæ fructus . Hærebat infixum animis singulare illud virtutum temperamentum , quæ quamquam in diversa ratione sunt positæ , eas tamen in amplissimo Cardinali mirabili nexu copulatas demirabantur . Tantam obstupecebant cum summa amplitudine animi demissionem , tantam cum eximia liberalitate continentiam , tantam cum incredibili mansuetudine severitatem . Neque verò hæc ostentatione quadam probitatis , sterilique præcipiendi studio in aliorum animos instillabat , ut illos non exemplo ipse suo , atque instituto vitæ genere condoceretur : Nam ut de iis pauca dicam , quæ ad hominum charitatem , ac pietatem erga superos pertinent , & in quibus cætera contineantur necesse est : quis divinam planè liberalissimi Principis beneficentiam possit oratione consequi , cujus peramplum cæteroqui patrimonium , quotannis in aliorum utilitatem effundebatur ? Non commemorabo , quibus ille præmiis familiares affecerit , quàm lautè cum in suburbana villa , tum in urbanis ædibus hospites , atque amicos exceperit , quantum pecuniæ ad augendam rem litterariam , aliasque liberales artes contulerit . Hæc omnia tacitus præteribo , utpote quæ in omnium oculos incurrentia orationis ornamenta non postulant . Ad illa venio , quæ , quamvis ea occultare de industria ipse vellet , palam tamen fiebant eorum , de quibus ipse benemeritus erat , prædicatione . Qui enim religiosus ordo fuit , qui Virginum sacrarum coetus , quis alieno oppressus ære , quis egenus , quis inops , qui non munificentissimi Principis liberalitatem experiretur ? Quid ? Præter plura aureorum millia , quæ unica largitione non semel ad tuendam periclitantium puellarum famam impendit , præterque ingentem auri vim , quam ex privato ære in pauperes erogavit ipso initi Pontificatus die , nonne certò constat singulis annis ab eo fuisse , quantum satis esset ad unius viri Principis censum , miserorum egeni

stati

(XVII)

statim sublevandæ liberaliter impertitum? De Religione
 verò, ac pietate in superos quid ego dicam? Dicam tem-
 pla sacrâ suppellectili aucta, amplis redditibus locuple-
 tata, ac majorum suorum instituto penè à fundamentis
 resecta? Dicam anniversarios Cœlitum festos dies omni
 ornatûs splendore, ac profusis ab eo sumptibus celebra-
 tos? Dicam, cum in Sacello Pontificio interesset, mode-
 stiam, atque in sacris obeundis muneribus dignitatem?
 Nos ipsi quoties illum in hac Ignatiana æde, aut in pro-
 xima Xaveriana vidimus, vel cum superos humi provo-
 lutus in genua demissè veneraretur, vel cum divinam rem
 faceret, vel cum solemnibus cæremoniis designatos mi-
 norum Ecclesiarum Episcopos inauguraret, vel cum
 Eucharisticum Angelorum panem ad plures horas cir-
 cumfusæ multitudini impertiretur? Video quamplurima
 multò exilius, atque jejuniùs à me, quàm pro ipsorum
 dignitate esse percursâ. Sed ad ipsum Pontificatum jam
 festinat Oratio mea. Hic enim verò non secus, ac Solis lu-
 men præstringit oculos, quominus aliò convertere aciem
 possint. Qua quidem in re quid primum, Auditores,
 quid postremum loquar? Num protractum paulò longius
 comitorum exitum, ut ex accepti muneris tarditate ma-
 gnitudinem æstimaremus? Num diem S. Joanni Gual-
 berto sacrum, ut meritò delectum humani generis pa-
 rentem esse constaret, qui magnanimâ, atque in omni
 vitâ perpetuâ injuriarum oblivione Civis illius Beatissimi
 mansuetudinem æmularetur? Num suffragatorum nume-
 rum, ac dignitatem, qui & ipsi ad illum honoris gra-
 dum idonei, cum tamen uni CORRINO potissimum con-
 venire juris jurandi religione interposita testati sunt?
 Num inditum sibi benignitatis, & comitatis plenum
 CLEMENTIS nomen, ut omnia pacata, atque tran-
 quilla eventura esse, tam experto nobis dato gubernatore,
 consideremus? Quidquid momenti expendam suis, du-
 bitare certè non possum, quin res tota hac peculiari Dei
 im-

(XVIII)

immortalis curâ administrata penitus videatur . Nam si in humanis eventibus vox ipsa , ac suffragatio populi ; quod in proverbii loco est , divinum quoque iudicium , ac voluntatem coarguit , poterat ne Cælum ipsum , Pontifex Beatissime , favere manifestius honori Tuo , quàm iis letitiæ significationibus , quas Tibi omnium ætatum , atque ordinum homines exhibuerunt ? Ubi palam factum est , Te esse unum , quem quatuor jam mensium votis moderatorem expetebamus , quæ Patriciorum , ac Procerum in Vaticanas ædes irruptio fuit ! Qui nationum , ac gentium plausus ! Quæ Regum , ac Cæsaris gratulatio ! Atque ut omittere cætera : illo ipso die , quo non minùs Pontificiis cohortibus , Romanoque Senatu , & universo nobilitatis flore stipatus , quàm plaudentium elatus vocibus in Quirinalem Regiam Te contulisti , nonne immortalitatis instar , ac Pontificiæ Majestatis triumphum migrationem illam fuisse dicam ? Perpetuum occupabat vias totius Civitatis agmen , septemque ipsi colles , ac tecta urbis convulsa penè sedibus suis Tibi obviam progredi videbantur . O spectaculum illud non hominibus modò , sed ipsis quoque Superis jucundissimum ! Manabant nobis ex oculis indices illæ , quas Ambrosius vocat , pietatis lacrymæ : Tu quoque ipse Tuas humanitatis , ac benevolentiae testes invicem rependebas . Quanta maximâ poteramus voce , comprecabamur , ut faustè Tibi prosperèque res cederent : Tu nutibus , ac dexterae sublatione , beatam , æternamque vitam , quæque apud Superos viget salutem deprecabaris . Supremam Tibi uni creditam potestatem Procores gratulabantur : Tu observantiam jure debitam in beneficii parte numerabas , & non secus , ac esset voluntarium officii genus modestissimâ grati animi significatione prosequeraris . Contentio erat utrinque : adnitebamus nos , ut filiorum pietatem erga humani generis parentem ostenderemus : Tu , ut in filios paternum verè animum , ac benevolentissimum declarares.

res. Neque verò frustrata nos opinio est: Ubi enim ex edita ista specula universum Christianum orbem circumspexisti, quid antiquius Tibi fuit, quàm ut, qui potestate, & honore cunctis jam hominibus antecellebas, ab eorum nullo salutis communis tuendæ studio superareris? Siquidem quæ statim annonæ facilitas est consecuta, viliori a Te constituto rerum pretio! Quàm sapientes leges imposita! Quanta spes bonis omnibus, ad bene de Republica sperandum, ostensa! Quid mihi igitur Poëtæ veteres auream illam ætatem fabulis comminiscuntur suis, cum, quemadmodum Posidonius apud Senecam memorat, & sapientes regnarent, & cæteris imperare Principem officium esset, non regnum? Nobis enim verò auream ^{Ep. 21.} ætatem obtigisse dicendum est sub illo Principe, in quo nihil amplitudo fortunæ mutavit, nisi ut prodesse tantundem hominum generi posset, quantum vellet. Equidem sic existimo, ad summam in dominatu felicitatem, conducere plurimum, ut eorum, quibus benefacere velit Princeps, dijudicare merita per se ipse possit, atque discernere, & quod memoriæ litteris proditum video, Principis virtutem esse maximam, nosse suos. Jam verò honores, magistratus, ac præfecturas nonne iis non semel esse commissas vidimus, qui, quod eas non optarent, non peterent, prope etiam recusarent, idcirco ad illas gerendas maximè omnium id præparati sunt? Antevertis benefaciendo, Pontifex sapiens, æstimasque ipse prius cujuscumque merita, quàm æstimentur ab iis, quibus meritorum præmia conferri debeant. Illud vero quantum nobis oculi, ac felicitatis spem facit, quod ad Cæsarem, Regesque litteras humanitatis, & officii plenas dedideris, quibus commonefacis illos, ut omni simultate deposita, universa studia sua ad tranquillum, pacatumque Reipublicæ statum conferant! Audita jam sunt a Christiano grege amantissimi Pastoris voces, auctoritateque Tua sancientur, uti confidimus, pacis conditiones illæ, quæ nulla

nulla possint umquam indignationis aura dimoveri, nulla
 cupiditate corrumpi, nullis animorum perturbationibus
 labefactari. His vigilantia, ac sapientia Tua partis hu-
 mano generi prosperitatibus illud etiam accedit, quod
 eximias animi dotes, atque ornamenta in posteros etiam
 Tuos admirabili quadam propagatione diffuderis: nullus-
 que planè est, qui, quam tecum habet, sanguinis conjun-
 ctionem non eò unicè referat, ut egregios mores Tuos
 proponat sibi tamquam ad imitandum exemplar absolutis-
 simum. Equidem cum Te Capitolium nuper triumphali
 planè ritu, & summa cum bonorum omnium gratulatio-
 ne conscendentem viderem, positasque in fornice Farne-
 siano virtutum Tuarum præstantissimarum imagines con-
 templerer: Hem, capi egomet sic mecum tacitus cogi-
 tare: illæ quidem vetustate temporis aliquando labefacta-
 tæ concidant, atque intereant necesse est. Vivas tamen,
 ac spirantes habet in amplissima cognatione sua CLE-
 MENS, in quas non posteritas modo possit, sed ipsa
 etiam aternitas intueri. Quæ cum ita sint gaude isto tam
 insigni bono, CLEMENS Beatissimo, & eximia re-
 rum præclare gestarum perpetuitate lætus jucundissima
 illa voluptate, quæ rectè factorum conscientiam conse-
 quitur, in plures, ac plures annos frui: hoc etiam no-
 mine quam simillimus Deus, cuius vicariam potestatem in
 terris geris, quod nihil, nihil agere omnino possis,
 quod non summa cum, atque gloria conjunctum sit.
 Vive igitur diutissimè, vive populorum saluti, bonorum
 omnium felicitati, orbis terrarum præsidio, vive gloriæ,
 quæ huic ætati nostræ dato Te illi moderatore, atque
 præside contigit sempiterna.

F I N I S.

325179



